

Il Grischun ha ina lescha da trasparenza

Vischnancas mantegnan lur autonomia

DA REST GIACUN DERMONT / ANR

■ **Cun gronda maioritad ha il cussegl grond relaschà ina nova lescha da trasparenza per ils organs statals chantunals. Las vischnancas èn libras da midar al nov princip u da restar tar il vegl.** Il chantun Grischun obtegna sco in dals ultims chantuns da la confederaziun svizra ina lescha che regla la trasparenza dals organs statals. Il midament dal princip da mantegniment da secret al princip da trasparenza munta ina midada fundamentala da la moda d'agir da las autoritads chantunals. Da nov ha mintga burgaisa e mintga burgais grischun il dretg d'in vista en documents dals organs chantunals.

Las vischnancas na vegnan betg sfurzadas

Las pli grondas discussiuns ha chaschunà la dumonda schebain la nova lescha da trasparenza duai valair be sin nivel chantunal u sch'il princip

duai esser liant er per las vischnancas. Oriundamain aveva la regenza previs d'introducir il princip da trasparenza er sin palancà communal. Cunter quest intent hai dentant dà opposiziun cunzunt dals cristiandemocrats e dals burgais-democrats. Ils adversaris da l'introducziun dal princip da trasparenza han cunzunt gi' resalvas areguard las expensas. Nagin basegn d'agir vesa il president da la citad da Glion, *Aurelio Casanova*. «Nus n'avain nagin deficit da trasparenza en las vischnancas», ha el ditg a chaschun da la debatta en il parlament, «ed i dat tractandas che n'èn betg adattadas per il public.» Nagin plaschair d'ina obligaziun per las vischnancas d'applitgar il nov princip n'avess er *Walter Grass* gi'. «En vischnancas pitschnas exista il privel da conclusiuns sin persunas, er schequellas na vegnan betg numnadas explicitamain», è l'avis dal president communal da la pitschna vischnanca d'Urmein.

Decisiun piz a cup

Las partidas pcd e pbd, che vegnan comunablamain cun lur 58 deputadas e deputads sin bunamain la mesadad dals sez en il cussegl grond, han cuntanschì lur finamira. Ensem cun singuls exponents da la fracziun liberaldemocrata han 60 parlamentararis votà per restrenscher il princip da trasparenza sin il nivel chantunal. Per integrar er las vischnancas e las regions en la nova lescha han votà 53 deputads, cunzunt da las partidas pld, ps, pps e pvl. Las vischnancas restan quattras libras d'introducir facultativamain il princip da trasparenza. La citad da Cuir per exempel vegn ad introducir quest princip en mintga cas. «Nus avain già decis da midar al princip da trasparenza», ha ditg il president da la citad, *Urs Marti*. Entras laschar a las vischnancas la tscherna da lur modus operandi en futur lascha il parlament grischun a talas tuttas libertads. Il chantun e singulas vischnancas van ordavant, a las autras vischnancas vegn dà il temps necessari per realisar las reformas correspundentas.